

太上慈悲道場消災九幽懺序

第一

三洞法師玄靜先生李含光撰

原夫赤明始開雲篆肇形於霄極炎漢後啓靈文漸布於人間西蜀則金闕遺科東吳則太極傳教絲是大有秘笈洞真瓊章張徐顧之於前陶陸敷之於後師資繼踵代生其人矣。

太上慈悲道場消災九幽懺者始自太極左仙公葛玄於後漢桓帝時居天台上虞山隱身修行感太極真人徐來勒下降于仙公之室以靈寶天書玉字洞真洞玄洞神三十六部寶經授之於仙公焉仙公在山精思靜念數十年間通神感聖山精木鬼衛護稽首沈魂逝魄悉得超生自謂大乘奧旨可以闡導衆生極濟沈溺遂於三洞品內撮其樞要纂集懺文使今當世群生悉聞悉見料來多士易悟易行至於無間鄴都阿鼻寒夜三途五苦八難九幽沈滯苦魂不遭幽閉乃及見存過去未來所犯新罪宿愆冤結災難普得法潤俱會正真因而流傳當爾之後趨惡緣者

百不二三悟善因者十有八九是故仙班之業爰備化導之功既盈故立斯文標于卷首云耳

正一天師清微弟子 洪百堅 製作

道教學術資訊網站

太上慈悲道場消災九幽懺卷之一

太極左仙公葛玄纂集

元始玉皇上帝聖應物流形隨方立教教非經寶莫廢塵迷口吐瓊文演茲靈秘還淳返素要此憑心就學有方見於斯矣生神章經言元始天尊以龍漢劫說洞真經一十二部一曰太一二曰妙林三曰太清四曰微視五曰上清六曰開化七曰元陽八曰妙真九曰開山十曰十仙十一曰玉林十二曰黃老此經蘊在大洞玉清境藏中至赤明劫說洞玄經一十二部一曰靈和二曰靈寶三曰通神四曰無量五曰集仙六曰內秘七曰至真八曰集善九曰練精十曰生死十一曰宮圖十二曰銷魔此經蘊在大洞上清境藏中至開皇劫說洞神經一十二部一曰太真二曰至德三曰黃庭四曰練氣五曰道德六曰元神七曰大劫八曰內簡九曰神祝十曰三皇十一曰按魔十二曰小劫此經蘊在大洞太清境藏中如是三洞真經三十六部列于金格七聖再範明乎玉篇萬劫一開法隨人出三洞者